

四庫全書

經部

欽定四庫全書

經部

春秋經解卷六

詳校官給事中臣戴璐

給事中臣溫常綬覆勘

總校官進士臣程嘉謨

校對官中書臣陸湘

謄錄監生臣胡灝

欽定四庫全書

春秋經解卷六

僖公

元年春王正月

僖公繼閔公之弒不行即位之禮春秋據實去之以見繼弒之法公穀之說皆是左氏曰公出故也按左氏之意以為閔公之弒僖公嘗出奔於是不言即位

宋 孫覺 撰

以公之出不以正月即位也定公六月即位春秋書之僖公即位不於正月書之又何傷乎趙子非之備矣

齊師宋師曹師次于聶北救邢

春秋之義凡次皆譏未有次而言救者力能救之則救之可也不能救矣又徒次焉蓋罪之也春秋言救言次者二襄二十三年叔孫豹帥師救晉次于雍榆及此年次于聶北救邢是也聶北之次先次而後救雍

榆之次先救而後次皆有罪矣於罪之中又為輕重  
焉齊侯伯業已盛諸侯皆已服從於是時也狄已入  
邢而將滅邢矣為齊威者不能攘夷狄使之不至於  
中國至其入中國而侵陵諸侯也則仗大義帥諸侯  
往救之爾乃次聶北也曰救邢焉師已次矣其能救  
乎實次而名救也雍榆之次齊伐晉也齊大魯小勢  
不能敵齊之彊又畏晉不敢不往也乃帥師救之而  
次于雍榆焉聶北之次先次而後救罪其能救而不

救也。雍榆之次先救而後次罪，其欲救而不敢也。齊威用師，春秋貶之曰：人未有曰師者，於是時稱師焉，所以見挾彊師而不能救，邢深罪之也。公羊曰：邢已亡矣，蓋狄滅之，按邢實不滅，不可言滅也。穀梁曰：以其不足乎揚，不言齊侯也。按不言齊侯，蓋貶之，爾何謂不足乎揚也。

夏六月，邢遷于夷儀。齊師、宋師、曹師城邢。

邢為狄人所逐，至于奔亡，遷都夷儀。書曰：邢遷邢自

遷也齊威閔邢之亡率諸侯之師而為之城得救患  
分災之道矣然春秋不書其爵但曰齊師云者方狄  
之伐邢齊侯早率諸侯救之則邢不至於遷而夷儀  
不必為城也齊威失救邢之義使邢至于遷也而為  
之城則與齊襄亡紀而葬紀伯姬也何異乎春秋之  
法前日後凡救邢城邢一事爾復叙諸侯之師者所  
以見齊威帥諸侯之師不能救之而徒城之也齊襄  
亡紀之國而葬其夫人不足以為義而滅紀之惡愈

彰齊威帥諸侯之師救邢而次于聶北邢已亡矣而帥師城邢城邢未足以為功而不救之情益顯齊襄之惡不可掩也乃徒奠其夫人威公挾諸侯之師坐視之而不救待其亡而為之城欲自大其功也春秋迹其意而誅之曰齊師宋師曹師城邢為之城爾又何用師哉左氏曰諸侯城之救患也穀梁曰美齊侯之功也按春秋方以齊威失救患之道罪之何美之乎秋七月戊辰夫人姜氏薨于夷齊人以歸



春秋之義弑君之賊人人皆得討之雖在其國雖在外諸侯有能以弑賊討之者則書之曰人所以廣忠孝之路而厚人倫也衛州吁弑其君完嘗立為君矣衛之臣子討之則書曰衛人殺州吁于濮陳佗弑太子免而立蔡人殺之則書曰蔡人殺陳佗弑君之賊不容於人倫能殺之者必皆稱人猶之殺異類也夫  
人姜氏惟箔不飾比弑二君不安其位而出奔於邾齊威討而殺之于夷以尸歸春秋與齊威之得討賊

之道不曰齊侯而書之曰人蓋夫人之行人人得討之也夫人言薨而不言殺內辭也書齊人以歸所以明齊人殺之也穀梁曰夫人薨不地地故也此說是也

楚人伐鄭

荆自此楚始改號也侵伐自此稱人者所以見中國之哀而荆蠻之彊暴也孟子曰人必自侮然後人侮之國必自伐然後人伐之荆蠻之俗至無禮義至無

知識者也中國王道明則遁逃遠去莫敢內向而窺  
覷矣至其哀陵而中國無人也則伐其小國執其諸  
侯無所不至矣春秋深罪中國之哀而荆蠻之盛也  
則漸見其迹焉以謂於是之時有能攘而却之者則  
荆蠻之暴庶幾可息柰何中國卒無其人焉故稱人  
稱爵與中國等其罪中國深矣

冬十月壬午公子友帥師敗莒師于鄆獲莒挈

閔二年公子慶父出奔莒慶父弑君之賊莒容而納

之蓋有罪矣乃復責賂於魯公子友為是帥師敗之  
于鄆獲其大夫挈穀梁之說江熙非之當矣

十有二月丁巳夫人氏之喪至自齊

春秋之法有不待貶絕而罪惡見者則直書其事爾  
一時所不能斷衆人所不能辯者則異其文以著之  
夫人姜氏之惡蓋不待貶而見之者矣然經不書姜  
但曰夫人氏焉公穀二傳則曰貶之杜預則曰闕文  
范甯則曰殺子之罪輕也要之皆未得聖人之意以

為賊之則姜氏之惡何待貶乎以為闕文則又妄以  
為殺子之罪輕於殺夫則是有可殺之君而弑君之  
賊猶有輕重也夫人孫于齊不言姜氏所以使齊絕  
之也齊者文姜父母之國父母之於子雖有罪惡得  
容隱焉若哀姜之惡蓋與文姜等矣為魯夫人則比  
弑二君為齊姜氏則見殺於齊侯氏者祖之所自出  
所以別其生焉若哀姜者為魯夫人而弑二君為齊  
姜氏則見殺罪惡貫盈至于天下之大四海之廣無

所容其一身蓋非齊姜氏也夫人氏而已於其孫邾  
其見殺於齊不去姜者孫邾所以別異姓見殺於齊  
所以與齊殺之惟其喪之至自齊也可以不言姜焉  
蓋聖人之輕重與奪惟其事之所在也

二年春王正月城楚丘

三傳之說皆以為楚丘衛邑齊威帥諸侯城之然按  
春秋之例諸侯城之者則書諸侯城邢城緣陵城虎  
牢城成周是也未有與諸侯同城而不叙諸侯者楚

丘之地見於傳記者皆以為衛邑衛詩定之方中序亦曰衛楚丘而詩中無之但曰楚宮楚室爾楚丘之名見於春秋者二隱之八年曰戎伐凡伯于楚丘以歸當凡伯之來聘戎遂伐之以歸經不言衛則楚丘安知非魯地乎於此城之又不言諸侯城楚丘益可疑也今地里楚邱屬宋則凡伯自周聘魯無緣更過宋也此蓋可疑之事且當闕之

夏虞師晉師滅下陽

下陽號邑也春秋邑不言滅特書下陽之滅而號不見經者蓋聖人之意以為虞公貪璧馬之賂而為晉假道以滅唇菑之國下陽舉而號滅矣春秋不書其滅但曰滅下陽者蓋號之滅見賣於所與之國聖人所不忍焉書滅下陽而已虞師首惡序晉之上至五年晉人執虞公虞亦滅矣又不書滅者蓋虞之滅乃在於滅號之時不在五年也經書虞師晉師滅下陽則是虞號之滅在於此舉然聖人於號則不忍其亡



在虞則先見其滅故號之滅但書下陽而虞之滅書  
執虞公也三傳之說皆是

秋九月齊侯宋公江人黃人盟于貫

貫之盟齊威德大著江黃小國遠來服從也公穀二  
傳皆以為遠國舉江黃則諸侯皆至然春秋之時天  
下諸侯亦以衆多齊威豈能盡服之乎但四國會盟  
爾安知當時之諸侯皆來乎公穀之說非

冬十月不雨

春秋之法一時不雨則書過時不雨則加自文以別之僖公三時不雨而首時皆志者穀梁謂之閔雨僖公有卹民之心一時不雨則憂其災及於物春秋據舊史書之以見其有志於民也

三年春王正月不雨夏四月不雨徐人取舒

舒國也徐人取之而不言滅者舒之宗祀復存未嘗見滅也舒者楚附庸之國服屬於楚徐人自楚取之使之屬徐也趙子曰凡得國不書滅者不絕其祀也

此說是也

六月雨

文公二年十年十三年逾時不雨皆加自文以別之  
僖公二年之中逾時不雨者九月於其首時皆曰不  
雨無自某至某之文左氏曰不曰旱不為災也此說  
雖通解春秋之義然於僖公未明也公羊曰上雨而  
不甚也然則首時之文又何也惟穀梁以為閔雨春  
秋緣人君愛民之心而書之比之二傳近而可訓且

當以穀梁為據也

秋齊侯宋公江人黃人會于陽穀

陽穀之會蓋齊威伯業之盛遂欲誇服諸侯爾而左氏以為謀伐楚也按伐楚之役江黃不與又楚方盛彊威公必不敢倡謀伐之左氏但見伐楚在於明年於此妄為之說也

冬公子友如齊涖盟

涖臨也春秋魯史其書魯事有內辭焉外臣之來者

書曰來盟來者自外之辭也內臣之往者書曰涖盟  
臨涖而盟之也我君之有道而大夫之賢所往之國  
無敵也臨之而已不書其人非其國之君敵吾大夫  
者爾不書簡辭也公羊曰往盟于彼穀梁曰涖者位  
也是皆不知春秋之謂內辭故各為之說也

四年春王正月公會齊侯宋公陳侯衛侯鄭伯許男曹  
伯侵蔡蔡潰遂伐楚次于陘

楚之為中國患齊威欲伐之久矣而蔡為楚之與國

當諸侯之道齊威侯遂帥諸侯之師侵其所與之國使之奔潰以懼楚人遂進而聲楚之罪以討之然又畏楚而不敢進也於是次于陘焉夫以楚之彊而侵陵中國也有日矣齊威志欲攘之而諸侯未服伯業未成於是數盟諸侯而諸侯信服北伐山戎而兵威已試齊威帥已試之師而從信服之諸侯南伐彊楚責包茅不入於天王蓋伯者之功於斯為盛春秋齊威用師二十餘年貶之曰人以其不務德而務力也

於是始書其爵以為其師知所討矣於其次陞而不  
進也蓋有罪焉春秋不深罪之所以見齊威之彊而  
不能當楚於次之中有足矜焉者矣左氏史記載侵  
蔡之事皆以為怒蔡姬之蕩舟然春秋於齊威之侵  
蔡伐楚也始書其爵孔子方進之不應其侵蔡有私  
也公羊曰次于陘侯屈完也按經文師自次爾安知  
屈完之來乎

夏許男新臣卒

欽定四庫全書

春秋經解

十一

春秋之法諸侯卒于其國都者不地雖其國不于其都猶地也蓋以國君之尊社稷人民之繫重卒不于其國者皆書其地以謹之也許男新臣會齊威而卒于師春秋之於新臣也不書其地蓋地者罪之也諸侯不自治其國家而奔走于會盟侵伐至于死非其所而社稷危焉則書地以罪之齊威之彊而伐楚之盛諸侯從之則國安身榮不從之則危辱滅亡至矣新臣雖死于師而春秋書之若卒于國者所以許新



臣之出會齊威異於他諸侯之卒也穀梁曰內威此  
說是也趙子曰新臣歸卒于國爾案經文次陘而書  
新臣之卒下有屈完來盟之事新臣豈能遽歸乎此  
說非也

楚屈完來盟于師盟于召陵

春秋大夫來盟者必書君使屈完之來不書使者屈  
完受命不受辭得專使之宜故不曰使也是時魯公  
在師以屈完自外而至故曰來盟春秋再言盟蓋屈

完受命來盟于師諸侯以其服從退軍召陵然後盟也若一書盟于召陵則無以見諸侯退師之實故先書來盟以見楚之服從又書盟于召陵以見諸侯之退師春秋之盛莫盛於齊威齊威之功莫大于召陵之盟然而孔子書之無異辭焉蓋王道之行則無伯者伯者雖盛皆王道之罪人故明乎王道然後知伯者之小論乎聖人然後知道德之大也楊子曰齊威之時縕而春秋美召陵習亂也蓋楊子之意亦曰召

陵無足美者也而春秋以習亂美之也公羊曰喜服楚也雖夷狄之盛然王道不繫之重輕而喜之何待聖人之小也穀梁曰內威師也趙子非之曰魯侯不在豈有言來之理乎此說是也

齊人執陳袁濤塗

執袁濤塗者蓋齊侯也書曰齊人貶之也他國之大夫雖有罪不可專執况無罪乎春秋之法執人之大夫不以其有罪無罪一貶之曰人罪其不受命于天

王而專執也濤塗之事見于左氏公羊皆以為誤齊侯之道而至于見執然春秋書之與執大夫之例等爾蓋專執之罪同也三傳之說公羊得之

五年春晉侯殺其世子申生

申生之事見于傳記備矣晉侯之惡不待貶絕而後見也然春秋之于申生無美辭焉蓋人子之道至于見殺則為不孝大矣舜之事瞽瞍亦允若而卒免于禍申生之于獻公也獻公聽讒而申生死之春秋舉

重者言之斥言晉侯而申生未免有罪也

杞伯姬來朝其子

婦人既嫁不逾境惟父母存得歸寧父母沒雖兄弟不往也春秋內女之歸者未嘗有曰子叔姬焉其書者皆非禮也杞伯姬既以非禮來魯又以其子來行朝禮失禮之甚者也書曰杞伯姬來朝其子則是杞伯姬魯侯皆有罪矣穀梁曰參譏之是也

公及齊侯宋公陳侯衛侯鄭伯許男曹伯會王世子于

首止

齊威欲帥諸侯以尊王室于是致王世子而會之首  
止不列叙世子者春秋尊之不與其致世子也齊威  
之伯始會世子晉文之伯至于召王齊威以方伯之  
威不能率諸侯以朝天子而致王世子會之至于晉  
文遂召天王而臣禮亡矣孔子罪作俑者至于用人  
蓋召世子而至于召王齊威之罪亦不可勝誅矣公  
羊曰世子貴也穀梁曰尊之也按春秋之法尊尊卑

卑不與其致世子特殊會以見其意貴之尊之皆非也

秋八月諸侯盟于首止鄭伯逃歸不盟

春秋之法間有異事則前目後凡首止之會間無異事而復叙諸侯者不與其盟王世子也世子者天子之子而世天下者也諸侯盟之而以不信加之聖人之所不與也特沒去世子而但曰諸侯也齊威于此大會諸侯以尊王室而鄭伯逃歸春秋惡其以國君

之尊而為匹夫之行義當留而竊去特曰逃歸也

楚人滅弦弦子奔黃

春秋國滅而其君死之者但書曰滅以其君歸者書  
名其君出奔者書奔奔者非無罪也校之隨君歸者  
則輕國滅而身死者非可褒也校之不死而奔者則  
善故滅人之國其罪則一而見滅之君其例有三也  
弦子出奔而不名罪輕于以歸者也

冬晉人執虞公



虞虢相為表裏之國也。虞公貪璧馬之賂，假晉道以亡虢，蓋虢亡而虞舉矣。春秋於虢之滅也，叙虞于晉上，而以下陽當之于虞之亡也，不言其遷，不言其滅，但曰執虞公，蓋虞之所依者虢也，貪賂而首惡，虢亡則虞亡，下陽之滅，虞已見滅，而晉已取虞，虞之亡也，四年于茲矣。于是但執虞公焉，非亡虞也。公羊曰：其言執之不與滅也。按虞之滅，蓋在下陽，故不再言。爾又曰：滅者亡國之善辭，按滅人亡國，大惡也。何謂

善乎

六年春王正月夏公會齊侯宋公陳侯衛侯曹伯伐鄭  
圍新城

去年鄭伯逃首止之盟齊侯于是帥諸侯伐之而圍  
其邑鄭伯誠有罪矣然為齊威者不務修德以綏懷  
諸侯乃恃其疆伐圍小國蓋其罪亦大矣公羊曰邑  
不言圍疆也按鄭小國而當齊威諸侯之師又一邑  
爾何能疆乎穀梁曰著鄭伯之罪也按鄭伯逃歸不

待貶絕而齊威伐人之國而圍其邑能無罪乎

秋楚人圍許諸侯遂救許

鄭伯逃歸而附楚故齊威帥諸侯伐之楚人救之而圍齊威所與之國齊威遂釋鄭圍而帥諸侯救之蓋楚人救鄭而圍許圍其所與必救者也春秋書之若曰齊威伐鄭未足以為討罪救許未足以為功不若務修其德以懷諸侯則鄭不須伐許不須救也齊威一失于首止之盟而天下兵革遂至連年春秋一切

著之以見威公之罪穀梁曰善救許也按春秋方罪之爾安得善乎

七年春齊人伐鄭

齊威以鄭附楚於是又使微者伐之爾齊威不務德而務侵伐春秋一切著之蓋其罪不待貶絕而自見矣

夏小邾子來朝

邾黎來自莊公五年來朝以後不見于經於是來朝

稱小邾子者蓋其隨從齊威伯主征伐假稱王命爵之故書子也言小者有大之辭所以著齊威伯主之興而附庸小國類多稱爵春秋因而書之益以見當時之爵或降或升惟伯者之所欲為爾其罪蓋不可勝誅之也

鄭殺其大夫申侯

春秋之法殺大夫稱國者罪諸侯也不言其爵不與其專殺也著大夫之名所以見其罪且有以別之也

其不名者皆闕之爾非美之也穀梁曰稱國以殺大夫殺無罪也按大夫無專殺之禮雖有罪不得殺焉春秋不與其專殺也故奪其爵以見之謂之殺無罪大夫非也

秋七月公會齊侯宋公陳世子款鄭世子華盟于甯母甯母之盟蓋鄭屢為齊所伐勢不自安故遣其世子盟齊威以紓一時之難然鄭伯知附楚之罪以求伯者又不能以身下之而徒遣其子卒以其故洮之盟

鄭伯不與而至于乞也禮之道自敵體皆不可失也况天下之盟主哉故陳鄭世子與盟而春秋書之以見其罪也

八年春王正月公會王人齊侯宋公衛侯許男曹伯陳世子款盟于洮

王人王之微者春秋尊之故雖微者銜天子之命亦叙諸侯之上也春秋伯者多假王命以令諸侯名尊天子而實行其私齊威是時致天王之命以會盟中

國雖其微者而春秋不與其盟諸侯也故顯言王人而列叙諸侯以見其罪王人而盟諸侯則王道之衰諸侯而盟王人則諸侯之仇盟者不信而後為之也天子諸侯矣而猶盟焉蓋君臣之交失道也其猶以齊侯為之重乎

鄭伯乞盟

春秋之法有義同而辭異者皆聖人之新意也天子有求于下則書求求者責也天王者合天下之尊一



物皆其所有于其所無也則責其下使共之爾故其  
取車取金也書之曰求求其所當入也諸侯之於諸  
侯土地有常守人民有常奉以其所無求其所有者  
皆非其道也故於求盟求師也書之曰乞非所有而  
乞之也春秋書求者三皆施之于天王書乞者六皆  
施之於諸侯鄭伯逃天下之盟主而附彊暴之夷狄  
甯母之盟雖嘗遣其世子又恐懼不安其國親來乞  
盟春秋罪之首止則著其逃逃盟則書其乞其賤之

之意如何也公穀皆曰孟酌之也經書鄭伯乞盟則  
是鄭伯親乞之實酌與之則當書曰使某乞盟此說  
非也

秋七月禘于太廟用致夫人

夫人之說三傳皆不同左氏則以為哀姜公羊則以  
為聲姜穀梁則以為成風或以為嫡母或以為庶母  
或以為夫人考經前後皆不可據然聖人但書夫人  
而不言姓氏則聖人之意亦不在於姓氏也禘者國

之大事而太廟魯之始祖之廟其不可失禮也明矣  
今乃以夫人之故而大禘太廟蓋禘不可以為夫人  
而設太廟不可以夫人而禘也其所當重者禘于太  
廟爾夫人何足道哉春秋之法祭祀失禮者書其祭  
名書曰禘于太廟則是非所宜禘而禘也用者不宜  
用也致者不宜致也聖人以不宜用以不宜致之辭  
加之夫人之上則夫人之氏姓亦不足道也國之大  
事莫大于禘魯國之尊莫大于太廟失禮大事躋祀

周公則其所用而致之者雖國之嫡母盛德之夫人不可當也况聲姜哀姜成風乎春秋沒去其氏姓但書夫人以謂凡夫人者皆不可也三傳皆非

九年春王三月丁丑宋公御說卒夏公會宰周公齊侯宋子衛侯鄭伯許男曹伯于葵丘

宰周公者天子三公又為冢宰者也宋稱子者御說之喪至是未逾年居喪稱子禮也春秋諸侯居喪而盟會侵伐者多矣其稱子者四爾孔子因而書之以

見其居喪而與乎國事之罪不稱子而行者其罪又不  
可勝誅也葵丘之會蓋齊威之極盛然而春秋無與  
辭焉以威公之彊盛而從服諸侯之日久矣其帥之  
朝天子獎王室如反掌然無難爾然威公持其彊盛  
致天子之冢宰以號令諸侯假天王為名而實自尊  
大春秋罪之故書曰公會宰周公齊侯宋子衛侯鄭  
伯許男曹伯于葵丘左氏之說辯疑非之當矣

秋七月乙酉伯姬卒

春秋內女許嫁而卒惟二爾伯姬子叔姬是也未目其國未適他國也必書其字許嫁者也許嫁而卒者春秋書之以吾君為之服因錄之也公穀之說皆是九月戊辰諸侯盟于葵丘

葵丘之盟實會宰周公自言諸侯而不叙宰周公者聖人不與齊威致天子之三公而與之盟三公之位迫于天子冢宰之權重于天下齊威不能尊事天子而假其位號以令諸侯又盟其世子盟其三公聖人

不與其以不信而加天王之近臣故其于盟葵丘也  
但曰諸侯焉蓋春秋之法近尊者則為之嫌遠尊者  
則不嫌其敵天子之大夫可得而侵伐王臣之微者  
可得而會盟至于三公之尊則近于天王世子之位  
則貴于天下故首止之會殊會世子葵丘之盟不盟  
周公皆春秋之變例聖人之新意也葵丘之盟孟子  
美之以為後之諸侯皆犯其五禁蓋春秋之盛莫盛  
于齊威齊威之盟莫著于葵丘之事齊威最高之業

春秋甚盛之際以孟子之時諸侯言之則齊盛在可  
褒之域校之三王之盛則齊盛又其罪人此春秋所  
以無褒而孟子言其有罪也

冬晉里克殺其君之子奚齊

春秋之法未逾年之君稱子其見殺者稱君稱子者  
人臣之心不忍變于中年稱君者已繼其位國人以  
之為君也齊公子商人弑其君舍舍未逾年之君也  
然商人之弑同于成君不得曰子也奚齊見殺與齊



舍等爾不曰其君而曰君之子者聖人之意也獻公  
有寵賤妾至聽其讒而殺其世子申生而立奚齊奚  
齊不當立而獻公以嬖立之里克因其不順而殺之書  
晉里克殺其君之子奚齊奚齊雖庶里克不得殺之  
里克有罪矣里克雖不得殺而奚齊不得為君里克  
殺其君之子罪不減于殺君然奚齊之不正始著奚  
齊嘗立為君不幸見殺于里克聖人惡其殺嫡而立  
斥曰其君之子而里克之罪不減此春秋所以斷疑

似之邪正而曲盡人情之難也穀梁曰國人不子其最精者歟

十年春秋滅溫溫子奔衛

溫子為狄所滅不能死位而出奔春秋書奔以罪之不書其名罪差于隨軍以歸者也

晉里克弒其君卓及其大夫荀息

春秋弒君二十有四而死難之臣三人而已荀息事迹見于傳記皆以謂從君子昏廢嫡而立庶然春秋

書之與孔父仇牧之事等而無異辭者蓋聖人所謂  
大臣以道事君不可則止者也若事君之日久不能  
致君子無過而至于見殺焉則其事君之道必未至  
矣雖死之何益也然其在春秋之時則猶有可取者  
爾孔父之死于與夷仇牧之死于捷皆正君所當得  
立者而猶無褒况如息哉卓之得立以獻公之私苟  
息之何意然而春秋之于息也無貶辭而書之與仇  
孔者類蓋苟息之所死者可知矣晉獻公殺其世子

而立奚齊奚齊見殺荀息立卓卓見殺而息死者卓  
爾卓安得立而荀息安所致死哉蓋書息之死卓則  
知息之所立者非其人也公羊云息之立非其君以  
死而賢之與仇孔者等息豈足道哉柳子厚曰春秋  
之進荀息非聖人之情也進荀息已甚苟免之惡忍  
之爾子厚不知春秋書荀息之死于卓以見其罪爾  
孔子安得隱忍而不罪之乎

夏晉殺其大夫里克

春秋殺大夫稱國者不與其君專殺大夫也里克比  
弑二君天下之大惡于其殺之也稱大夫而不與專  
殺蓋春秋之法雖弑君之賊以其罪討之則書之為  
人不以其罪討之則為專殺里克雖有弑君之罪而  
夷吾嘗命為大夫矣又以已私殺之晉殺其大夫爾  
非討弑賊也齊公子商人弑其君舍而立于其見殺  
也書曰齊人弑其君商人商人雖有弑君之罪而齊  
人殺之者以已怨焉齊人弑君爾非討殺賊也弑

君之賊固春秋所不容然當時討之必正其罪不正其罪而殺之猶之不討也故晉殺里克得殺大夫之罪齊人弑商人被弑君之惡善春秋之輕重與奪必皆盡當時之情非苟然也穀梁曰殺之不以其罪此說是

冬大雨雪

春秋書雨雪者三而言大者二大者非常之辭雨雪非常而為災故志之爾公羊曰大雨電何以書記異

也按左氏穀梁皆作雪公羊未可據也

十有一年春晉殺其大夫平鄭父

左氏載平鄭見殺之迹以為謀出晉君平鄭謀出其君蓋有罪矣然春秋不與其專殺者以其命之為大夫則賢者矣安得有罪之人乎大夫有罪則所以命之者非其人也不得已則放之可也何至於殺之乎故春秋之義大夫之罪如平鄭者猶不可專殺况無罪乎

夏公及夫人姜氏會齊侯于陽穀

婦人無事不逾境公乃及其夫人會齊侯春秋以其  
非禮特書之以為戒

秋八月大雩

雩旱祭也旱而祈雨其祭非常故曰大雩也雩則旱  
矣不曰旱而曰雩者但雩而已旱不為災也歲旱而  
大雩有志於民且其事非常故志之爾穀梁之說何  
休非之當矣



十有二年春王三月庚午日有食之夏楚人滅黃

黃小國而近於楚齊威之興始釋楚而從齊會盟侵  
伐惟齊威之所令於是楚人滅之而齊不能救故春  
秋書之既以見夷狄之疆且罪齊威之不救也穀梁  
曰君子閔之蓋春秋之意也

十有三年夏公會齊侯宋公陳侯衛侯鄭伯許男曹伯于鹹  
謹按鹹之會二傳皆無事迹惟左氏以為謀杞謀王  
室按王室之事不載于經而明年經書城緣陵前目

後凡則謀杞之說與經合矣

十有四年春諸侯城緣陵

緣陵之地經不言杞者杞未遷也不叙諸侯而凡言之者會鹹之諸侯於是復合而城之前目後凡春秋之簡辭也去年之冬經書公子友如齊則是公子友受命於魯公而聘齊侯也公子友受命而聘則齊魯之君皆嘗反其國矣然經不再叙之者以去年定其謀今年終其役事無殊異國無增損可以簡言之矣

春秋城杞城邢斥言其國緣陵虎牢但書其地蓋遷國者書國未遷者書地春秋之法然也會盟戰敵不書其地之國名可推而知者也左氏曰不書其人有關也按前目後凡何所闕乎公羊曰徐莒脅之案徐莒亦小國爾何能脅杞使遷乎且經無其事未可據也穀梁曰諸侯散辭也按會鹹之諸侯歸而復合前目後凡爾何散乎三傳之說皆非

夏六月季姬及鄆子遇于防使鄆子來朝

春秋之法內女適人者以國繫之明有所從也杞伯  
姬宋蕩伯姬是也未適人者但書其字未有所從字  
以別之也伯姬子叔姬是也經書季姬及鄆子遇于  
防非禮可知也又使之來朝謀來詣已惡之甚者也  
季姬鄆子之惡不待貶而後見所以為僖公者罪不  
可責也左氏以為季姬歸寧而公止之故遇于防而  
使之朝按春秋內女適它國者季姬未嘗言歸于鄆  
而明年始書之又經不曰鄆季姬明其未歸鄆也左

氏徒見醜惡之甚以為必不至此故曲為之解文姜  
哀姜之行有甚於此者矣季姬之事經書之甚明無  
足疑也穀梁曰以病鄆也春秋三罪之何止鄆子哉  
秋八月辛卯沙鹿崩

春秋災異之志必言其國雨螽大水星隕鷓退書宋災書  
齊災書陳大書成周大沙鹿崩梁山崩皆非魯地而  
春秋書之有內辭焉此聖人之意也夫水火之為災  
石鷓之為異地不過百里時不過數日所以召之者

止於其君所以應之者盡於一國故國不可不著也  
至於王道大壞彛倫一斁而天下之人皆反皇極則  
天見其變而日食星孛地見其妖而川竭山崩所以  
名之者在於天下所以應之者徧於四海則雖在其  
國不得著其國也日有食之星孛于某其變之大其  
應之廣不可以一國言也沙鹿崩梁山崩雖在於晉  
而異及於天下不可以晉言也沙山名也鹿足也山  
崩而其足舉崩異之甚者也詩曰百川沸騰山冢萃

崩冢山頂也山崩其頂以為大異况其足隨之乎異之大者也左氏記卜偃之言曰幾年將有大咎幾亡國按沙鹿之崩其異在于天下何獨晉乎卜偃之言妄矣左氏載之非也公羊曰為天下記異此最得之十有五年春楚人伐徐

徐自僖公三年書徐人取舒始見于經杜丘之盟齊歲始會侯侯謀之而使大夫救其見伐故卒有婁林之敗然則徐人附齊而外楚故至楚人伐且敗之而諸

左氏曰楚人伐徐徐即諸夏故也左  
氏得之矣

三月公會齊侯宋公陳侯衛侯鄭伯許男曹伯盟于牡  
丘遂次于匡

牡丘之會實齊威會諸侯將救徐然畏楚而不敢進  
也故次于康齊威伯業之盛如此又從天下之諸侯  
其帥之以義而救人之危益甚易爾然畏楚而不敢  
進徒次于康春秋書之蓋譏之也夫兵者量力而後



動中節而後行齊威之力可以動救徐之節可以行  
反畏之而不進徒次于康而使大夫救之書次書救  
再罪之也

公孫敖帥師及諸侯之大夫救徐

齊威從天下之諸侯不能救徐之見伐而使大夫救  
之罪其不親往也夫以彊楚之無知而徐人之弱小  
齊威不即救之而盟于牡丘次于康至其將見滅也  
而使大夫救之是齊威壅彊兵不敢當楚假救徐之

名以助之而實不能救故徐卒不免婁林之敗也春秋之義禦夷狄欲其不來強中國欲其無敵公追戎于濟西譏其不能使之不來而徒追之也遂伐楚次于陞譏其不能窮討而次之爾盟于牡丘次于康而大夫救徐春秋之意可知矣春秋之法前目後凡魯公而再與諸侯序則但曰諸侯魯公則一也大夫與大夫序必書大夫之名有衆大夫而為之別也諸侯會而大夫行事魯即書大夫之名而諸侯之大夫不

序春秋魯史魯事則詳書之以別衆大夫也葵丘之盟不曰公及諸侯盟者魯一君爾不歎非公也宋之盟叔孫豹實與焉盟而再言豹者別他大夫也救徐之師杜丘諸侯之大夫也必曰公孫敖焉所以詳內而為之別也穀梁曰善救徐也案經書盟于杜丘次于康而大夫救徐蓋罪之爾何謂善乎

秋七月齊師曹師伐厲

厲者楚所與之國也齊威以楚之強威數暴中國故

帥曹伐之楚有暴中國之罪齊畏其強不敢伐而伐其所與之厲厲何罪乎怒楚而伐厲齊威失所伐矣

季姬歸于鄆

季姬之歸不書所逆逆者鄆子也內女之歸不書送者皆其君自來逆之常事不書爾季姬惡行當絕而春秋書之與內女之歸無異蓋季姬之貶已見於遇鄆子于防之時於是但以恩錄之爾

己邠晦震夷伯之廟

夷伯魯大夫春秋魯大夫既卒之後例書其字公子  
友如陳葬原仲是也震者雷電擊之春秋紀異故書  
之爾遇晦書晦遇朔書朔戊申朔隕石于宋五是也已卯  
晦震夷伯之廟公穀皆曰晦冥非也左氏以為展氏有隱匿  
震而罪之天道之浩大安得物禍而人福之展氏有隱匿而  
天輒震焉奸惡而得志者天道遺之何也非也公羊曰稱夷  
伯者天戒之故大之夷伯微者因天罰而字之理自不安也  
楚人敗徐于婁林

春秋之法內敗外師不言戰不使外敵內也中國敗外域不言戰不使外域敵中國也外域敗外域不言戰彼自相殘不重輕也春秋之義近尊者則為之嫌遠尊者不嫌其敵內之於外中國之於外域近尊者為之嫌不使之敵也外域之於外域去內已踈去中國已遠為之辭雖同於內同於中國不嫌其敵也楚人敗徐于婁林與內之敗外中國之敗外域無異辭焉不嫌故也徐人之睦于齊而見伐于楚齊威盟于

壯丘次于匡使大夫救之而楚卒敗之則齊威之救  
為無益也書曰楚人敗徐于婁林所以病齊威也

十有一月壬戌晉侯及秦伯戰于韓獲晉侯

晉師不敗而其君見獲故但書戰書獲而不言敗也  
獲之者禽之也晉師與秦戰其師未敗而身見禽焉不  
可必言師敗也晉侯內失其民外深秦怨春秋書曰  
獲晉侯蓋賤之也公羊曰君獲不言師敗績若如其  
說師實不敗君見獲如何書乎左氏穀梁之說是

十有六年春王正月戊申朔隕石于宋五是月六鷁退  
飛過宋都

石鷁之說公穀皆是也然公羊曰春秋不書晦非也  
春秋之法惟日食不書晦聖人以謂日食必於朔食  
晦者歷失也春秋日食不書晦所以正萬世之歷也  
其他事遇晦朔則書無不書之理也又曰外異不書  
按春秋宋衛陳鄭無不書者何獨宋王者之後乎穀  
梁曰是月者決不日而月也按春秋不以日月為例



書是月者所以別非戊申之日爾不書其日所不可  
知闕之也又曰石無知鷁有知按石鷁之志所以著  
其為異爾何論有知無知乎又曰五石六鷁之辭不  
設則王道不亢按石鷁之辭孔子所謂致廣大而盡  
精微者也廣大有所不致而徒盡其精微其於王道  
亦踈矣謂石鷁之辭足亢王道亦穀梁之偏說也

三月壬申公子季友卒

春秋內臣之卒書氏書名未有字之與言其兄弟者

而公子季友書字公弟叔盱稱弟皆賢之也公子季友當莊公之昏閔公之弱賊臣擾攘之際爰立僖公而魯難遂已國家安寧蓋其賢且有功者也春秋於其來歸也字而不名曰季子來歸於其卒也惜而不忍曰公子季及卒公子遂殺子赤而立宣公宣公立而不討遂之罪公弟叔盱非之不食其祿又不舍其凡而去春秋以為得弟之道非大夫而書卒字且稱弟曰公弟叔盱卒春秋內臣之見于經者四十七書字

者三十其書字以卒之者二人而已季友叔肝是也  
豈非賢乎

夏四月丙申鄆季姬卒

春秋內女適諸侯者書卒以魯公為九月之服恩錄  
之鄆季姬是也時君非其兄弟無九月之服者不書  
其卒杞伯姬是也適諸侯而大歸者見棄於他國則  
非夫人也非夫人則無九月之服亦不書卒鄭伯姬  
是也適諸侯之大夫者無服無服者亦不書卒莒慶

叔姬是也鄆季姬惡行當絕於春秋然而君為之九月服吾為之變故卒言也

十有七年春齊人徐人伐英氏

英氏近於楚而附屬之齊威以楚之疆而暴中國也於是使微者會徐人伐之且為徐申其忿也左氏曰報婁林之役此說是也

夏滅項

項國名也公穀二傳皆以為齊威滅之而為之諱之

也然春秋之作不待傳而後明實齊滅之而以內滅  
為文則是齊威之罪見原而魯無辜被誅也蓋二傳  
之意以滅國為大惡春秋諱內大惡必不書滅也滅  
人之國誠大惡矣魯不幸而有之如何為之諱乎書  
取郟不滅鄆之宗祀但取而屬我鄆非滅爾故不書  
滅項實滅之而不存其祀如何不書滅乎春秋書魯  
滅者惟一蓋魯自滅國少爾何足疑哉左氏之說是  
秋夫人姜氏會齊侯于卞

左氏載夫人會齊侯之事以為齊威止公故夫人會齊侯以釋之然考之於經無魯侯見執之迹春秋雖為內諱亦不全沒其事則異其文爾如公弑書薨而不地殺大夫書刺奔走變為孫不全沒其事也若齊侯實嘗執公亦當異辭以見之經無其辭則左氏未可據也若夫人因救解魯公而會齊侯聖人亦當恕之未可直以非禮之辭加之也經言會齊侯于下則非禮可知矣左氏之說非

十有八年春王正月宋公曹伯衛人邾人伐齊

按宋公下公羊

有會

字

左氏載齊侯既卒之後五公子爭立故宋帥諸侯之師伐之將立孝公也夫人國亂而為之立君蓋義舉矣然春秋書之有伐喪之迹十二月齊侯卒至是正月方兩月爾而諸侯伐之齊威會盟侵伐以安中國為事者四十餘年於其卒未兩月也諸侯相帥伐之藉使齊之公子爭立為諸侯者但當擇其可立者而

立之爾乃因其亂而伐之無公心救齊之亂而幸其  
有喪乘其爭立伐之以為利故春秋原其情而書之  
曰伐齊穀梁曰非伐喪矣此說是

夏師救齊

齊威之沒諸侯乘其喪伐之曾於是使微者帥師救  
之夫伐之者有罪救之者益可喜也

五月戊寅宋師及齊師戰于廟齊師敗績

春秋之例以見伐者為主宋於是時帥諸侯之師伐



齊既已伐而去諸侯之師皆歸齊師反伐宋師故以宋為主而及齊師戰也公羊以為與宋穀梁以為惡宋蓋皆不知齊反伐宋故宋主之爾若於伐齊之時宋遂及戰不應曹衛邾不與也此當以左氏為定

### 狄救齊

中國諸侯相滅亡有能救之者則春秋善之齊威會盟侵伐四十餘年攘夷狄尊中國存亡繼絕者不可勝數死未逾年而諸侯伐之戰至於敗狄不忍而救

之春秋書曰狄救齊蓋傷中國爾

冬邢人狄人伐衛

春秋之法外裔以中國言之未嘗有稱人者於其伐衛也特曰狄人焉非進狄人所以傷中國也衛嘗見滅於狄而齊威封之木瓜之詩美齊威而作也齊威死未逾年而衛人同諸侯伐之邢人恃以復存者威公也於是而不忍齊之見伐而衛之無恩也與狄伐之春秋書曰邢人狄人伐衛所以見中國之衰諸侯伐

齊狄能救之則進之曰人狄非可進所以罪諸侯也  
故春秋之義有非可善而善之者皆有傷也紀侯大  
去其國非善紀侯也所以罪殺人以圖存者也及其  
大夫孔父非善孔父也所以罪賣君以苟生者也然  
則名陵之師非善齊威也以其承衰亂而攘僭亂也  
伐衛之役非進狄人也所以傷中國而罪諸侯也春  
秋之義於此最微乎穀梁曰善累而後進之亦一偏  
之論也

十有九年春王三月宋人執滕子嬰齊

諸侯不受命於天王而專執者貶之曰人罪其以諸侯之尊而為匹夫之行微之也諸侯失地生名嬰齊見執而遂失其地故名之也

夏六月宋公曹人邾人盟于曹南

曹南之盟蓋宋襄公求伯而為之也曹邾皆稱人者蓋宋襄威德未著曹邾但使其臣會之亦猶北杏之會齊威稱公而諸侯稱人也春秋不與臣敵君雖大

夫亦稱人爾公羊作宋人非也

鄆子會盟于邾己酉邾人執鄆子用之

鄆子會曹南之盟不及及邾子會因求盟焉邾子因  
其至己之國乘其無備執而用之蓋邾之與鄆世讎  
之國故宣十八年又戕鄆子于其國都但鄆邾小國  
其相讎之迹不能悉見經惟記其無道之甚者爾用  
之之說三傳皆不同左氏以為用之於次睢之社公  
穀皆以為血社至昭十一年楚人執蔡世子友以歸

用之杜預則以為祭山公羊則以為築防趙子之徒  
又以為用為盟歆之牲皆不同也然考之於經但曰  
用之不云所用之迹按子路見殺於衛曰醢之矣遂  
命覆醢蓋春秋之時有用人為牲用人為醢大亂之  
極聖人所不忍言但曰用之則知以人為用也不必  
正其名其所重之者用之而已春秋弑君之賊其弑  
之迹多矣不必皆以刃也然孔子書之曰弑蓋所誅  
者弑君之罪爾何論於弑之之迹乎春秋殺他國之

君者多矣然未有用之之重者其重者用之爾何論  
於用之之迹乎左氏之說辯疑非之詳矣

秋宋人圍曹

曹南之盟口血未乾而宋人圍曹用見宋襄之伯不  
成也善乎子魚之言深有補于後世矣

衛人伐邢

去年之冬邢伐衛於是衛人報之爾左氏曰衛有大  
旱師興而雨邢之惡何至於紂而衛之有道焉此於

武王左氏之說妄矣

冬會陳人蔡人楚人鄭人盟于齊梁亡

左氏以梁好土功穀梁以梁為淫酒而亡然孔子書  
梁亡爾不曰所以亡也蓋所以亡之道衆一惡不足  
以盡之為人之君而不向道不志於仁危亡之來皆  
自取之也其自亡之迹不必論也公羊曰魚爛而亡  
其最優乎

二十年春新作南門



春秋之法言新則有舊也言作則有加也因其舊而  
制度有加焉則所謂新作者也春秋興作皆書不以  
其時不時有宜有不宜為例也左氏曰書不時蓋譏  
其淺近者爾

五月乙巳西宮災

西宮僖公所居之西宮也以其在西故曰西爾公羊  
曰有西宮則有東宮此說是也穀梁以為閔宮按僖  
公繼閔而立若實閔宮何妨言新宮乎為其已久何

妨言閔宮乎因其近因其疏變而言於記事之法無  
乃不明乎

秋齊人狄人盟于邢

前年之冬邢人狄人伐衛以救齊於是三國會盟於  
邢之國都不書其地地以邢也狄人以救之善於是  
又為之盟以安齊春秋書之曰人所以罪諸侯而傷  
中國也穀梁曰邢為主乎救齊實盟于邢之國都故  
地邢爾謂之以邢為主非也

二十有一年春狄侵衛

狄嘗有救齊之善春秋於伐衛盟邢再言狄人非進之也所以傷無霸也至其侵衛則狄人之常行曰國而不言人以例書之無所褒貶也

宋人齊人楚人盟于鹿上

鹿上之盟三國皆微者爾宋實主之故叙其上也宋國小德薄而求諸侯不量其力而以抗彊楚至于見執至于見敗幾亡其國蓋其禍自茲盟始焉左氏載

子魚之言蓋善量其國者也

夏大旱

春秋之記災異有曰不雨者旱不為災陰陽不和之異也有曰大雩者旱未為災非時而雩也有曰大旱者旱而為災非常也旱而為災則不雨矣然不雨淺於旱也旱則雩矣言雩未見其為災也春秋書大旱者二非常為災之辭也穀梁曰旱時正也按早歷時而為災自書時爾何論正與不正乎

秋宋公楚子陳侯蔡侯鄭伯許男曹伯會于孟執宋公以伐宋

春秋因會而執諸侯惟二處爾孟之會楚人執宋公而不言楚人溴梁之會晉侯執莒子邾子而斥言晉人二事略同而書之異辭者聖人之意也春秋之義責其所可責不責其所不可責孟之會執宋公者楚子也而聖人以諸侯共執為文蓋楚子蠻夷之君而無知之人也中國之諸侯隨盟主而會夷狄夷狄執其盟主又隨

夷狄而伐之夷狄何足責也中國之諸侯有罪爾執  
宋公以伐宋罪不專於楚子諸侯實同之也溴梁之  
會晉侯以大義率諸侯而會焉乃於其會執辱諸侯  
以信致之以詐執之執莒邾之君者晉侯也諸侯何  
與焉楚子夷狄不足責之可責者諸侯也晉侯中國  
之君禮義之出信會而詐執之可責者晉侯也蓋春  
秋之輕重與奪惟義所在爾公羊曰不與夷狄之執  
中國也楚子夷狄爾聖人雖不與之夷狄豈知義乎

公羊不知責夷狄之義故為之說爾

楚人使宜申來獻捷

春秋書楚有漸焉非進之也所以見中國無人而外  
裔暴彊也於其未盛而驅攘之易為爾至其彊暴而  
中國不能當也則其君稱爵其臣稱名會盟侵伐與  
中國諸侯無異文焉非進楚也所以罪中國也楚之  
入中國久矣未嘗有書爵者於其會于孟始曰楚子  
焉楚之書爵非進之也中國衰而外裔盛也其他行

事類書楚人君臣同辭春秋待外裔之法也會孟之後二十年次于厥貉復曰楚子自是之後君臣始不同辭焉所以見中國之衰益甚矣春秋書獻捷者二齊侯來獻戎捷書曰齊侯罪其矜功伐勞斥言其爵也楚人使宜申來獻捷勝則誇矜敗則逃遁南蠻常情春秋不責備也楚子稱人外裔之法君臣同辭也齊稱戎捷捷山戎也山戎則可捷矣而獻有罪焉不得沒戎捷而不言也宋襄求伯而不果至于見執而



伐之宋中國也而荆蠻捷之荆蠻安得捷吾中國乎  
不曰宋捷不以中國而捷於荆蠻也公羊曰楚子稱  
人賤也夷狄亦足賤乎又曰為宋襄諱襄公何足賢  
而諱之哉穀梁曰不與楚捷於宋也楚荆蠻爾安足  
以輕重較之乎有與不與者猶足以輕重言之也  
十有二月癸丑公會諸侯盟于薄釋宋公

諸侯會孟而執宋公而公會諸侯盟以釋之春秋之  
法主內顯言善隱言惡釋宋公者蓋我之善顯言之

春秋之法臣子之辭也穀梁曰不與楚專釋也按實公會諸侯釋之安得謂之不與楚釋乎

二十二年春公伐邾取須句

左氏載伐邾取須句之事謂須句為國見滅於邾而其君奔魯公為是伐邾取須句而反其君若能如此則是魯得所伐且有存亡繼絕之功然春秋書之與代邾取訾婁伐莒取向其文無異考尋經意止是須句為邾邑公伐邾而取之爾既伐其國又取其邑蓋

其罪大矣左氏乃以魯為得禮然則孔子罪之而左氏善之也此當據經為定爾左氏之言不足憑也

秋八月丁未及邾人戰于升陘

春秋之義內不言戰言戰則敗敗則不言其人我之公及大夫無敗故也穀梁曰不言其人以吾敗也此說是冬十有一月己巳朔宋公及楚人戰于泓宋師敗績

春秋之義內不言戰言戰則敗也中國不言戰言戰則敗也宋中國也楚夷狄也泓之戰言戰言敗待楚

人以中國也蓋楚人之入中國之日久侵伐盟會於中國而中國不能攘之非楚能中國也而中國皆楚焉春秋於楚之漸盛而不外之者非進之也所以一中國於夷狄也楚稱人君臣同辭之法也公羊曰雖文王之戰亦不過此孔子曰我戰則勝非謂能戰而勝也勝之道素修而無敵於天下也豈若宋襄勝之道不修而苟拘小信乎公羊殆未知文王之戰爾穀梁責宋襄有以取之乃近於道也

二十有三年春齊侯伐宋圍絳

春秋之法舉重者言之伐與圍兩者皆重不可偏遺  
伐者聲其罪圍者以兵環之伐其國矣又圍其邑焉  
惡之故兩書也公羊曰疾重穀梁曰以惡報惡皆非  
也

夏五月庚寅宋公茲父卒

春秋之法告卒書卒會葬書葬宋襄之不葬魯不會  
之故不書公羊曰盈乎諱葬宋襄何賢而為之諱乎

春秋雖賢不諱况非賢乎穀梁曰失民也春秋失民而葬者多矣何獨宋襄不葬乎

二十有四年秋七月冬天王出居于鄭

春秋之義自周無出天下一周爾故雖王子之奔不書出也曰天王矣乃出居於外乎天王而出于外則是天王自絕於位也自絕其位則天下非其所有不能有天下矣猶曰出居於鄭天王雖不有天下而鄭不可無天王也春秋之義自取之者以自取為丈君

雖不君臣不可以不臣天王出居於鄭是也天王自  
絕之迹不見於經而公羊左氏有得罪於母之說然  
經不言焉蓋聖人之意以為天下之大元元之衆而  
天王一人者治之則其道德仁義有以先天下而帥  
元元也一言之非一動之失則不足以為天下王矣  
為天王而自絕於天下則其迹亦不足言也况得罪  
於母又惡之至者乎故曰天王出居于鄭而已三傳  
之說皆通

二十有五年春王正月丙午衛侯燬滅邢

春秋之法諸侯不生名失地滅同姓則名為人子孫而失先君之土地與已同姓之國而彊滅之皆非人君之行也故生名以賤之三傳之說皆通

宋蕩伯姬來逆婦

親迎之禮自諸侯達於士庶人未有姑而迎婦者也書宋蕩伯姬來迎婦非禮可知矣

宋殺其大夫



春秋之義殺大夫不書爵不與其專殺大夫也為大夫而見殺則其賢否可知矣故不以其有罪無罪皆無與辭宋殺大夫不書名史失之爾無所見也公羊曰宋無大夫按經書大夫安得曰無大夫也穀梁曰以其在祖之位而尊之按孔子作春秋以垂萬世豈可因其在己祖之位尊而不名乎若然則春秋乃孔子家史非國史也二傳之說皆非

秋楚人圍陳納頓子于頓

春秋之法繼事書遂楚人圍陳納頓子于頓而不言  
遂者圍陳所以納頓子也杜預曰頓迫於陳而奔楚  
楚圍陳納之不言遂者明一事也頓子迫陳奔楚之  
迹雖不見經然以理觀之杜預之言得之矣公羊曰  
兩之也案經兩之者當再言楚人經不再言安知其  
兩之乎穀梁曰蓋納頓子者陳也案經言圍陳爾何  
能納頓子乎

冬十有二月癸亥公會衛子莒慶盟于洮

春秋之義不以我公敵大夫以我公而會外大夫則皆降而稱人人微者遠尊則不嫌其敵也於其會諸侯而大夫與焉雖大夫不嫌也有諸侯為之敵則大夫雖從若微者然不能與公仇也莒慶小國之大夫而得與公盟者有衛子在不嫌也衛侯稱子者衛文公卒未逾年也

二十有六年春齊人侵我西鄙公追齊師至鄙弗及

春秋書追者二皆譏之也禦寇之道當使之不來不

能使之不來而徒追之蓋有罪矣況至遠地而不能  
及乎春秋之法戰稱人敗稱師重其以衆敗也齊之  
侵也曰入公之追也曰師大公之追也寇侵其國國  
無有備而見侵焉寇去已遠而窮追之入其地其侵  
也曰人微者將偏師爾其追也曰師我公之追之不  
可以不言師也非師不足以我公追之也追之弗及  
則譏已著矣變人曰師又所以為內辭也穀梁曰以  
弗及大之罪也公羊曰侈也二者皆非也

公子遂如楚乞師

人道貴者讓也以其所無求其所有則是無廉與讓而人道之至賤也春秋之義天王則書之曰求求責也諸侯則書之曰乞乞賤辭也於魯則書曰告告內辭也求乞之間也春秋書求者三皆施之於天王也書乞者六皆施之於諸侯也書告者一但施之於內也公子遂內臣也如楚乞師內乞也不曰告而曰乞春秋之變例而聖人之意也內不言戰戰不言敗戰

者敵也外能敵內則敗矣春秋十二公之間二百四十二年之久內有敗外師者矣內有與外戰者矣未嘗有書內敗者也非內能不敗也蓋雖敗而不言以為責備之法也乾時之戰書戰書敗無內辭焉內有取敗之道也威公見殺於齊莊公之父雖未復而納讎人之子至于戰至于敗非外能敗內也內有取敗之道也楚夷狄也齊中國也中國而相侵伐不過以禮義相責廉恥相屬爾魯之見侵於齊不治其禮義

之所不至而使之不來乃使其臣乞師于楚楚夷狄也何知禮義何知廉恥是以殺戮侵伐為事者爾僖公不自反其不至而乞救於夷狄夷狄化外爾見侮於人而乞救於化外化外豈有知乎書曰如楚乞師蓋賤之也乾時之戰內有取賤之道則書之曰敗績公子遂之行內有可賤之理則書曰乞師蓋春秋之例如何公羊曰重師穀梁曰重辭蓋皆不知例有變焉故曲為之說也

秋楚人滅夔以夔子歸

春秋滅國以其君歸者其君書名罪其見滅於人而蒙恥忍辱隨之以歸也以歸而不名者惟夔子爾楚夷狄之國而夔其類也以夷狄滅夷狄不以例書之者賤略之也諸侯書戰書敗曰敗某于某不云戰也春秋之於不以例書之者皆賤略之也穀梁曰以歸猶愈乎執也按實執之而隨軍以歸爾何得曰愈乎

冬楚人伐宋圍緡



言伐言圍兩重之爾公穀曰刺道用師也按孟子曰  
殺一不辜而得天下不為也然則至于用師以相侵  
伐者皆孟子之罪人也公穀以為道用師為有罪然  
則專用師得無罪與楚師楚人罪自等爾何獨非道  
用師乎

公以楚師伐齊取穀

公以夷狄之師伐中國而取其邑蓋其惡不待貶而  
後見也穀梁曰使民以其死非正也他國之師使之

死且非正己國之師得曰正乎此說誤矣

二十有七年冬楚人陳侯蔡侯鄭伯許男圍宋

春秋之義可以諸侯會微者不以諸侯會大夫北杏  
之會齊威稱爵而諸侯稱人齊威伯者將會諸侯以  
攘夷狄而尊中國春秋著威公之爵而降諸侯稱人  
將授之方伯之事不得不推尊之而書其爵諸侯將  
從之以安天下不得不降而稱人也圍宋之役楚子  
稱人而諸侯稱爵楚子夷狄而諸侯從之宋中國而

諸侯圍之中國諸侯而隨夷狄以圍同列貶諸侯稱人而書楚子則不見諸侯隨從夷狄之罪惟書楚子為人而序諸侯之上則諸侯之罪著矣蓋與北杏之會所書不同而褒貶之意相類也公羊曰為執宋公故終僖公之篇貶也按春秋無貶夷狄之道楚雖執宋公宋公有罪爾諸侯能釋之諸侯自可善爾何與於貶楚稱人哉穀梁曰人楚子所以人諸侯此說是也

十有二月甲戌公會諸侯盟于宋

宋見圍于諸侯而公會諸侯盟于其地則宋之圍釋可知矣地宋宋與盟無疑也

二十有八年春晉侯侵曹晉侯伐衛

齊威之興四十餘年貶其用師曰齊人以其不務德而務兵也伐楚之後始進而稱爵以為伯功之著攘夷狄尊中國在此舉矣晉文之興與齊威異齊威屢合諸侯威信大洽然後北伐山戎南伐彊楚以尊大

中國四十餘年主盟諸夏而夷狄莫之敢陵犯中國  
晉文之興于茲五年未嘗見其行事一朝以彊兵侵  
曹伐衛而執衛侯執曹伯夫彊楚之侵陵久矣中國  
既無伯主以主盟諸侯則諸侯之從之也宜矣晉文  
有志于中國當大會諸侯合心并力以攘夷狄樊王  
室為義諸侯有不從者然後以師征之則誰敢不服  
曹衛之君附夷狄之楚而背中國誠有罪矣然晉文  
未嘗會盟而號令之而遽以兵侵伐亦與齊威異矣

孔子曰不教而誅謂之虐孟子曰教之不改而後誅之若晉文之侵曹伐衛蓋所謂不教而誅者也春秋用師之盛未有盛于齊威而貶之曰人以齊威為可責也諸侯用師君行稱爵臣行稱名不可責者不責之也晉文用師之始遂書其爵蓋亦不可責之者焉與春秋之諸侯等矣春秋之法因事而有事曰遂侵曹伐衛一晉侯爾不曰遂焉蓋所以罪之也齊威侵蔡遂伐楚不再言齊侯者侵蔡所以伐楚也楚為中

國之患日久蔡為其與國而當用師之道侵之潰所以懼楚而遂伐之春秋不以侵蔡累齊侯故曰遂伐楚也晉文不攘戎狄以懷諸侯而侵曹侵衛以陵中國夷狄之為害者未能攘却而中國諸侯先已殘暴再言晉侯所以見其重傷諸夏也公羊曰不言遂未侵曹也按先侵曹而後伐衛何得曰未侵曹乎穀梁曰再稱晉侯忌也按再言所以罪之爾晉侯之忌何足言乎

公子買戍衛不卒戍刺之

春秋魯史其書魯事有內辭也諸侯殺大夫書殺罪其專殺也魯殺大夫書刺周禮斷萬民以三刺之法魯之殺之者必其罪在可殺三刺而後殺之也非魯能三刺也大夫之尊而我公乃殺之其罪在三刺則殺之矣殺之雖不以罪而春秋猶曰刺焉若曰斷庶民不可以不刺况殺大夫乎我公之殺大夫則是三刺後殺之也待之愈厚則責之愈周書之益順則貶



之益至春秋書刺者二公子偃不書所刺之罪而公子買著不卒戍之迹偃則有當刺而買在可恕之域也諸侯受天子之命守天子之土國家之事不治而土地失亡則有罪矣何能治他國乎衛附于楚而見伐于晉衛則取之魯何與焉公乃使其臣戍之不卒戍反殺之衛不當戍者也衛之見伐以全衛不能支晉侯買豈能卒戍哉不當戍而戍已有罪矣不能卒戍又殺之書曰公子買戍衛不卒戍刺之明買無罪

而見殺也公羊曰其言戍衛何遂公意也按實戍而不卒爾何所遂乎穀梁曰先名後刺殺有罪也按買無罪故錄其事爾穀梁之說非

三月丙午晉侯入曹執曹伯畀宋人

春秋之法執諸侯大夫者稱人罪其專執也執得其罪又歸之京師者稱爵與其得方伯之討也晉侯執曹伯畀宋人曹伯雖有附楚之罪而晉文之興未嘗會盟以令之一朝入其國執其君又畀于宋人非方

伯之討矣春秋稱其爵非與之者也以入曹見之也  
入曹者晉侯也于其入曹稱爵則執曹伯不可再言  
晉人也諸侯而執諸侯已有罪矣又不歸之京師而  
畀宋人宋非天王而受之亦有罪矣晉執之有罪當  
貶稱人而以入曹書爵宋受之有罪故貶之曰人也  
宋受晉侯之畀猶稱人執而畀之者非方伯之討又  
可知也穀梁曰不以晉侯畀宋公穀梁不知貶宋公  
之義故曲為說爾

夏四月己巳晉侯齊師宋師秦師及楚人戰于城濮楚師敗績

春秋之法將卑師衆稱師齊宋秦三國隨從晉文以與楚戰不容皆遣微者而將全師然惟晉書爵而三國皆稱師焉蓋聖人之意北杏之會稱人人則隨從無疑也城濮之戰稱師則盛疆無敵也北杏之會齊威九合之始春秋書其始所以要其終城濮之戰晉文伯功之盛春秋與其盛則其外無觀焉稱人稱師

雖所書之迹少間而貴之之意不異矣公羊曰楚稱人何貶按楚之臣不稱名者君臣同辭之法爾非貶其敵君也

衛侯出奔楚

晉侯伐衛而楚人救之衛附夷狄而叛中國其迹明也於是晉侯敗楚師而衛侯不安其國至于出奔春秋之法諸侯失地則名衛侯奔楚獨得不名者非赦之也以晉侯之迫出奔其重者晉也春秋之義有罪

在可貶而不貶者皆有所見也國滅而出奔者法當書名也隨軍以歸者罪又重焉不得不殺出奔者之名以為以歸者之重也諸侯失地則生名矣衛侯之奔也晉人迫之春秋欲重迫者之罪也不得不殺衛侯之名以見之焉若衛侯者聖人非不欲名之名之則不見晉侯之罪聖人是以不名焉非赦之也

五月癸丑會晉侯齊侯宋公蔡侯鄭伯衛子莒子盟于

踐土

踐土之會晉文實致天王經不言之不與其致天王也諸侯盟于踐土而公朝于王所天王不致則魯公安得朝于王所乎齊威之興始致世子晉文之興遂召天王春秋於首止殊會世子不與其盟王之世子也踐土之會沒去天王不與其臣召君也春秋之法居喪稱子衛侯出奔而與盟者稱子春秋不與晉文逐君而擅立公子也子者居喪之稱衛人無喪而稱子以明非衛子之罪而晉侯擅立之罪衛子以居喪之

稱不敢當正君也孔子曰齊威正而不譎晉文譎而不正齊威之正非孔子所謂正也校之以晉文則正矣然則若晉文者未能庶幾於齊威况王道歟若踐土之召天王皆所謂譎而不正也

陳侯如會

陳侯本不與踐土之會畏晉文之威而來赴故曰如會也公羊曰後會當召之陳侯不召而至故曰如會公羊之說非



公朝于王所

踐土之會晉文實致天王春秋不與其致之故不書  
爾天王至踐土則諸侯皆朝春秋不與其致天王而  
朝也但曰公朝于王所言公之朝之則諸侯可知矣  
王之所在也不朝于京師而朝于王所則公之朝其  
禮亦有所未至矣晉侯不致天王則公之朝禮必不  
行矣書曰公朝于王所則是不與諸侯致王而朝公  
之朝亦非誠心也著一事則衆惡皆見矣

六月衛侯鄭自楚復歸于衛

春秋之例嘗有其位而歸者曰復歸衛侯鄭見迫于  
晉而奔楚楚奉之以歸而復其位故曰衛侯鄭自楚  
復歸于衛

衛元咺出奔晉

元咺之事見于左氏以為奉叔武為君而逐衛侯經  
書咺出入之迹衛侯歸則咺奔咺復歸則衛侯出藉  
使咺之所立得其賢然咺為臣而逐君亦不可訓矣

故春秋書咺之出入最為詳備若咺者聖人所深誅者歟

天王狩于河陽

尚書載天子巡狩之事至方岳之下而諸侯會朝以考治亂而行黜陟之法周衰之日久平憇而下益以不振而齊威晉文更伯天下又懼諸侯之不從而會盟之不合也始假借天王以號令中國齊威始致世子致三公藉尊周為名而實自彊大晉文之興中國

益弱而夷狄彊暴諸侯多懼而從之晉文始致天子于踐土又致之于河陽挾天子之名以令中國而中國諸侯始去楚而從晉于時周室之衰蓋于列國諸侯皆莫知有王矣威文之興始尊事之以號令諸夏而天下諸侯尚知有周周之不亡威文力也然聖人之于齊威也不與其致世子三公而殊為之會于晉文則不與其再召天王而以天王自狩為文一時之周無威文之伯則周且亡矣後世之臣襲威文之迹

則遂無君矣孔子深嘉其有功于一時而又欲為法於後世盟于首止盟于葵丘則殊世子周公未嘗輒與而諸侯自盟也踐土之盟全沒其迹河陽之迹天王自行焉夫以春秋之時天王之弱巡狩之禮其能舉乎聖人以為臣之見君未嘗于外君之朝臣必于其廟惟巡狩之禮行而天王在外也則諸侯見之可于外而君之受朝不必于廟也書天王狩于河陽而公朝于王所則君臣不易之禮而萬世之通法也

豈止區區一晉文之名避而諱之哉左氏曰言非其地也且明德也按晉文名王其罪大矣安得德乎穀梁曰溫河陽也按溫與河陽自是巨邑爾安得合而言之乎穀梁欲附會其大天子小諸侯之說故曲生此義爾

壬申公朝于王所

春秋繫事以日繫月未有日而不月者而壬申之日上無所繫史之闕文無所見也天王狩于河陽而朝

馬不言諸侯而言公言公之朝可以見諸侯之朝也  
穀梁曰其不月以晉侯之行事為己慎矣按晉侯行  
事之失在于再致天王而不與之安在日而不月以  
為貶乎

晉人執衛侯歸之于京師

春秋諸侯執諸侯諸侯執大夫者貶之曰人以其執  
非其罪又不歸之京師晉執衛侯歸京師可以為伯  
討矣然春秋書曰晉人不與其受元咺之譖而執衛

侯直其臣而曲其君不可訓也衛侯歸衛元咺奔晉而晉執衛侯晉之執之以何罪歟受臣之讒而執人之君雖歸之京師不得以為伯討執曹伯歸于京師不曰歸之執衛侯而加之焉此非衍文則彼必闕文也聖人之意如何爾歸于之于不足校也而公羊有罪定未定之說何其迂哉穀梁以為緩辭亦非也

衛元咺自晉復歸于衛

元咺奔晉訟其君其君見執晉奉之復其位于衛元



咺內無衛侯之難而外得晉侯之助安而復其位故  
曰復歸也咺之罪不待貶絕而見矣為晉侯者執其  
君復其臣蓋非伯主靖亂之義也書曰自晉晉侯之  
罪亦已明矣

諸侯逐圍許

晉又再會諸侯而許未嘗與溫之諸侯逐合而圍許  
討許之不從中國也

曹伯襄復歸于曹遂會諸侯圍許

曹伯見執于晉以畀宋人於是始復其位歸而諸侯  
圍許不安其國遂往從之懼晉之復見討也晉文執  
曹伯畀之宋人至于經年得釋而歸不少留又從之  
圍伐晉侯一出而中國騷然至于終歲務以靖亂而  
更擾之皆所謂譎而不正者也

二十有九年春介葛盧來

春秋之法諸侯來魯書朝諸侯相朝哀世之禮也故  
春秋之間諸侯之來者皆書曰來朝言其以小事大

以弱畏疆而朝事之如臣之于君也春秋夷狄之君來魯者三但書其來而不曰來朝蓋夷狄之俗聖人外之欲其不來來朝不足以為榮不來不足以為辱故雖其君至魯亦不曰朝不以諸侯遇之禮讓責之也介者東夷之國其行事未嘗見於春秋于是再言其來而明年有侵蕭之迹蓋自是始通于魯也春秋之法自外而至者書來介葛盧來白狄來一也蓋聖人之意凡曰來者皆以不來為善也公羊曰不能乎

朝介葛盧能自通于魯矣豈復不能行朝禮乎穀梁  
曰微國之君未爵案邾邾來來朝稱名而行朝禮微  
國之君何妨書朝乎左氏曰公在會按于冬又來公  
已嘗見之矣亦不言朝自相違戾也

夏六月會王人晉人宋人齊人陳人蔡人秦人盟于翟泉  
翟泉之盟內外皆微者爾晉文致王人于會而使微  
者盟焉晉文之罪也

三十年春王正月夏狄侵齊秋衛殺其大夫元咺及公

子瑕

元咺訟其君于晉晉執其君歸之京師衛國無君元咺立公子瑕衛侯得釋歸國先使其臣殺咺及瑕而後入也公子瑕嘗立為君矣于是殺之猶曰公子瑕見立于元咺爾非受命于天王傳國于先君者也不曰其君非君也元咺及之者言瑕之見殺由于元咺立之元咺存則公子瑕存元咺死則公子瑕死咺立之君咺殺則公子瑕死也荀息之死繫于於晉卓以

卓及息者弒成君也于瑕之死繫于元咺以咺及瑕者殺公子也穀梁曰公子瑕累也以尊及卑也按公子瑕之死乃元咺累之先咺後瑕又非以尊及卑之義穀梁之說非

衛侯鄭歸于衛

春秋之義復其位曰復歸衛侯鄭嘗有衛國而為衛之君雖晉人執之然猶曰衛侯鄭也于其歸也言歸而不言復春秋之變例而聖人之微旨也諸侯受命

于天子封之黜之惟天王得專其命衛侯見執于晉  
晉歸之于京師使聽命於天子衛侯鄭歸于衛是天  
子釋之使歸也衛侯之執歸京師則是嘗失其爵而  
不為衛君矣天子釋之歸則是受命于王而為君于  
衛與新受封者同也故衛侯鄭雖嘗有國而歸不言  
復所以稟命于天王也公羊曰其言歸何歸惡乎元  
咺按書衛侯鄭爾又何惡于元咺哉

冬天王使宰周公來聘

禮雖有天子聘諸侯之義然義不當使三公書曰宰  
周公來聘見周之衰而諸侯彊盛也

公子遂如京師遂如晉

是時晉文方彊而諸侯畏之實使公子遂聘晉而因  
周公之來遂使往報故如京師春秋之義不可先晉  
而後京師故曰遂也此猶王人雖微必序諸侯之上  
聖人之法不與其以卑及尊故先京師而後晉也公  
羊曰公不得為政按自聖人正上下之法故曰遂非



譏公子遂之專政也不敢叛京師孔子之意也

三十有一年春取濟西田

左氏公羊皆以為晉侯以曹地分諸侯而魯取濟西之田然按經書之與取汶陽田相等爾無異文此蓋晉侯執曹伯而反諸侯之侵地魯濟西之田嘗見侵入於曹魯于是而取之取其嘗所有之田于曹非取曹田故不繫之曹也陸氏之徒雖知田不繫于曹則非曹田然又不明曹嘗侵地而魯復得之左氏公羊

雖以田為曹田又不明曹嘗侵魯之地皆妄為之說也

公子遂如晉

左氏雖言魯受田于晉而使公子遂拜之然亦未明田本魯田也公子遂如晉乃是拜晉反曹侵地爾非拜曹也

夏四月四卜郊不從乃免牲猶三望

春秋之法祭祀失禮者斥言祭名主為下事者但言

大事禘嘗烝繹失則書其名大事有事于祭無譏則  
主譏下事雩者求雨之祭龍見則雩非龍見之月而  
雩皆為非禮故春秋書雩者二十一而未嘗在龍見  
之時所書之意可知矣郊望之禮非魯所得行者而  
成王妄賜魯公僭受春秋欲書以譏之又其來已久  
歲嘗行之一切皆書則厭於繁重故因其失禮有災  
則并書祭名以見所譏之意天子祭天地諸侯祭社  
稷與封內之山川而魯為諸侯兼祀天地失禮之大

者春秋書郊者九皆卜不吉失時牛災則書然必皆  
曰郊此聖人之意也禮曰三王之郊一用夏正又曰  
季秋大饗于明堂蓋夏時之正月九月天子郊時之  
正也噫嘻之郊祈穀于上帝祈穀必于正月農人將  
有事之時也昊天有成命之詩郊祀天地郊祀必于  
九月萬物大成之時也周頌二詩則曰祈穀之謂也  
正月以祈之九月以報之一歲而再郊也魯郊則非  
禮矣而春秋書之正月夏時之十一月也十一月養

牛三月在滌禮也春秋之四月夏時之二月也二月而卜郊魯之郊不敢並天子之時而殺從于二月也春秋之九月夏時之七月七月而郊不時用不宜用也正月書牛可以見養牛之禮四月書卜可以見魯郊之殺九月書用可以見郊時之失蓋天子之郊則用于夏正而魯郊則降從于二月也天子一歲再郊而魯郊歲一行焉又以降于天子也前郊三月養牛于滌卜不吉而免之曰牲嘗置之于上帝也傷者曰

牛已傷之牛不可以瀆尊稱也諸侯之封內山川得祭魯之三望公羊曰太山河海是也太山在其封內而河海猶遠于魯魯望而祭之亦非禮也三望之禮又因郊而行焉不郊矣猶三望乎猶曰可以已也三傳之說公羊最得之

冬祀伯姬來求婦

昏禮有六納采問名納吉納幣請期五者皆命使者而夫不自行惟親迎之禮其夫行焉祀伯姬為子求

婦而歸至于魯非禮可知矣伯姬之求得不得未可知而遂以婦言之者其始來求則雖未得之而姑道存也故曰婦也

十有二月衛遷于帝丘

春秋之法自遷其國者曰某遷于某衛人見迫于狄所居不安而遷于帝丘也春秋書之罪其勞民擾衆去先君之土守雖云避難而行然不能使難不加己又勞舉國以避之其為勞且擾之蓋亦甚矣重之所

以志之也

三十有二年春王正月夏四月己丑鄭伯捷卒衛人侵狄秋衛人及狄盟

去年狄侵衛衛人報之而侵狄焉侵之而狄服遂與之盟然不曰衛人狄人盟而曰及狄盟者春秋外夷狄之法也春秋之法內與外盟則書會書及中國與夷狄亦曰及書曰衛人及狄盟衛之罪不待貶絕而見也



三十有三年春王二月秦人入滑

經書秦人入滑而晉敗秦則是秦之師入滑而後敗也左氏載秦出師之迹以為滅滑而還然經但書入而不書其滅蓋滑未嘗滅左氏之說非也

夏四月辛巳晉人及姜戎敗秦師于殽

春秋之法內敗外不言戰言戰則敗也中國敗外裔不言戰言戰則敗也殽之戰晉敗秦師不曰戰而曰敗者外秦也晉文之興主盟中國以攘却彊楚數年

之間中夏復盛而夷狄屏息天王狩于河陽而諸侯  
率朝周之不亡威文更伯之力也重耳之卒未逾一  
年而秦由僻陋乘中國之無伯越數千里以伐鄭鄭  
中國之諸侯而晉同姓之國秦越千里而伐之其無  
晉也甚矣襄公于是墨線行師敗秦于葭書曰敗秦  
師所以甚秦之惡而與晉之勝也晉襄居喪禮當稱  
子不曰子而曰人者諸侯居喪已奠稱君未奠稱子  
承父之志而繼其位不忍有變於柩前也晉文之伯

功未泯而秦人亡之出千里之遠越晉而伐其所與  
之國晉襄不忍隳其父之業往救而敗之書曰晉子  
則不免背殞出師之罪變例而書之曰人則是全晉  
之人敗秦師于殺也春秋之例有稱人以為褒有稱  
子以為貶弑君之賊雖國君討之而書之曰人蓋亦  
與之稱人與晉敗秦師其例等爾尚書秦誓之序曰秦穆  
公伐鄭晉襄公帥師敗諸殺雖其自誓之辭有可取  
然伐鄭而見敗則其過不得掩焉春秋書晉人敗秦

師則與晉而狄秦尚書載其自誓則許其改過而新之蓋聖人之意惟其事之善否所在爾公穀皆曰晉襄之稱人貶而微之也是皆不得孔子與之之意陸氏曰許其以權變禮異乎匹夫之孝此說是也

秋公子遂帥師伐邾

夏公伐邾取其邑秋又使其臣伐之春秋一切志之用見天下無王而諸侯橫暴侵伐無已也

晉人敗狄于箕

春秋中國敗夷狄不言戰夷狄無敵中國之道治則夷狄不來來斯敗之而已晉人敗狄于箕不言戰春秋敗夷狄之法也

隕霜不殺草李梅實

陰陽四時之氣天地所以生殺萬物者雨露生之雪霜殺之天地自然之氣而四時之常也皇極之道行而和氣塞於天地之間則陰陽之氣有常而生殺以時也彛倫攸斁而干過於陰陽則當生者不生當殺者

不殺雖天地之大無窮而陰陽之氣無形然以其小  
可以驗其大以其近可以推其遠春秋之十二月夏  
時之十月也十月隕霜而草不死李梅實皆異之大  
者也春秋之法為災而及于民物者則書為異而反  
常者則書十月之霜草當殺而不殺十月之李梅不  
當實而反實天地陰陽之氣非常可怪者也定元年  
十月隕霜殺菽春秋十月夏之八月霜未當隕而隕  
菽難殺之物而殺之蓋春秋之義舉要者言之爾草

易殺也而不殺焉不殺者書草其要者草也菽難殺也而八月殺之殺之者書菽其要者菽也公殺之說皆是



春秋經解卷六